



Høyanger, 16.10.08

Nærings- og handelsdep.
Postboks 8014 Dep.
0030 OSLO

Bruk reservasjonsretten mot EU sitt tenestedirektiv!

LO i Ytre Sogn viser til departementet sitt høyringsbrev datert 30.6.08 og uttalar følgjande:

EF-domstolen har i fire ulike dommar bestemt at EU-reglane om fri flyt av tenester skal få overkøyre dei enkelte landa sin arbeidsrett og faglege rettar i desse landa. Dermed blir det dessverre denne domstolen som avgjer om norske tiltak mot sosial dumping er i strid med direktivet. LO i Ytre Sogn krev difor at regjeringa brukar EØS-avtalen sin reservasjonsrett mot tenestedirektivet – for dermed å kunne innføre betre og nødvendige tiltak mot sosial dumping.

Dei fire dommene som vi refererer til er desse:

"Viking Line":

Finsk fagrørsle trua med boikottaksjonar mot Viking Line si utflagging av ferja Rosella til Estland. Selskapet sitt føremål med utflagginga var sjølvsagt å skaffe seg ekstraprofitt frå estiske løner som er lågare enn finske. Viking Line gjekk til sak og fekk medhald i EF-domstolen som slo fast at streikerett og faglege kampmiddel må vike før fri etableringsrett. Dette er høgre-politikk!

Laval/Vaxholm:

Det svenske bygningsarbeidarforbundet blokkerte det latviske selskapet Laval som ikkje ville opprette svensk tariffavtale og gje svensk løn til dei latviske arbeidarane sine på oppdrag i den svenske kommunen Vaxholm. EF-domstolen bestemte at bygn.arb.forbundet ikkje kunne bruke dei avtalefesta aksjonsformene sine for å opprette tariffavtale. Blokade og boikott blei rekna som hindring for fri flyt av tenester. Dette er høgre-politikk!

Niedersachsen/Ruffert:

Den tyske delstaten Niedersachsen har lovfesta at offentlege byggjeoppdrag berre kan gå til bedrifter som har forplikta seg til å betale sine tilsette tysk tariffløn. Hovudentreprenøren er forplikta til å pålegg ev. underentreprenørar same vilkår. Styresmaktene sa opp avtalen med bedrifta *Objekt und Bauregie* fordi den brukte polske underentreprenørar som betale sine bygningsarbeidarar under halvparten av gjeldande tariffløn. EF-domstolen gav bedrifta medhald og konkluderte med at delstaten sitt krav var i motstrid til EU-retten. Dette er høgrepolitikk!

Luxemburg:

Luxemburg har fleire nasjonale reglar for besøkande tenesteytarar og som skal motverke sosial dumping. Det er m.a. krav om automatisk oppjustering av minsteløn, oppfølging av ikkjef

allmenngjorde tariffavtalar, krav om heiltid og likeløn ved mellombelse tilsetjingsforhold. EU-kommisjonen meinte desse nasjonale krava til arbeids- og lønnsvilkår var i EU-stridig. EF-domstolen gav Kommisjonen fullt medhald og fann at dei nasjonale krava var ulovlege. Dommen seier til og med at ein ikkje kan krevje arbeidskontraktar av utanlandske firma. Dette er høgre-politikk!


LO i Ytre Sogn vil også vise til dei klare vedtaka i fleire LO-forbund og krev at regjeringa i denne saka tek i bruk reservasjonsretten mot EU sitt tenestedirektiv.

LO

Med helsing

LO i Ytre Sogn

Astrid Refsdahl Henden
leiar



Einar Rysjedal
sekretær